



**Unnuisarfinnut nunatta avataaneersunut unnuisunut nunatsinni unnuinermut akitsuummik takornariaqarnermut inuussutissarsiornikkut nunatta inuinit tamanut isertitaqaataasussamik siunnerfilimmik Naalakkersuisut UKA2020 misissuinissamik peqquneqarnissaanik inatsisartut aalajangiiffissaatut siunnersuut. Misissoqquneqarluni takornariaqarnermut innarliutaasinnaangitsumik nunat allat ilinniarfigalugit aaqqissuussinissaq.**

(Inatsisartunut Ilaasortaq Aqqalu C. Jerimiassen, Atassut)

Inatsisartunut ilaasortap Aqqalu C. Jeremiassenip aaliangiiffigisassatut siunnersuutaanut, qulani pineqartumut qujalluta, matumuuna Inuit Ataqatigiinniit imaattumik oqaaseqaateqassaagut.

Aqqalu Jeremiassenip oqariartuutaanut, tassalu takornarissat nunatta karsianut suli annerusumik iluaqutaaneruseriaqalernerannik oqariartuuteqarneranut isumaqataanerput Inuit Ataqatigiinniit oqaatigissavarput.

Aqqalu Jeremiassenip assersuusiortuluni siunnersuutigaa takornarissap ataatsip, unnuinermini unnuk ataaseq 40kr-mik unnuinerminut akileraaruserneqartalernissaa; tamannalumi eqqunneqassagaluarpat aningaasatigut, allaffissornikkullu kingunerisinnaasai pillugit misissuisoqassasoq.

Aqqalu Jeremiassen ilumoorpoq oqarami, nunat allat ilaanni ileqqoq nalinginnaasoq tassaammat unnuisarfinni unnuinerup akileraaruserneqartarnera. Allaallumi nunat allat ilaanni nunamut iserniarneq allaat aamma akileraaruserneqartarpoq. Assersuutigiinnarsinnaavarput USA-mut takornariarneraanni, nunamut isernissamut akuerineqarnissamik qinnuteqaqqaqqaarluni aatsaat isertoqarsinnaavoq, qinnuteqarnerlu nalinginnaasumik inummut ataatsimut 60kr-missaaniit 250kr-missaata tungaanut akeqarsinnaavoq, unnuisarfimmilu unnuinermut, unnuinermullu nalingata saniatigut 10% missaataa tungaanut akileraarusiisoqartarluni.

Taamaattumik siunnersuut qulaani pineqartoq asseqanngitsuunngilaq, tupinnartuunanilu.

Ukiuni kingullerni marlunni nunatsinni unnuisartut amerliartornerat akornusinngikkaluarlugu, takornarissap sukkut tamatigut nunatta karsianut iluaqutaanerulernissaa ujjartortuartaqarparput.

Assersuutigiinnarlugu 2015-mioqqooqaaq umiarsuutigut takornarissanut tikittartunut tunngatillugu, akileraartarnikkut oqilisaanikuuvugut. Inummut ataatsimut akileraarusiisarunnaarluta, umiarsuulli angissussaa tunngavigalugu akileraarusiisalersimalluta.

Aaqqiisimanerput naatsumik oqaatigalugu oqilisaaneruvoq, akikilliliisimanermik taaneqarsinnaasoq.

Iluaqutaasimasutut oqaatigisariaqarunarpoq, tassami assersuutigiinnarlugu aasaq manna umiarsuarnik takornariaqartaatinik nunatsinnut tikittunik aatsaat taama amerlatigisunik takusimannuatsiarunarpunga.

Aasaq manna umiarsuit sisamat – tallimaanngikkunik ataatsikkut Sisimiuniittut Ilulissaniittullu naammattoorpakka; assaa takornarissat aamakorsuit.

Torraq ajunngilluinnarpoq, tassa kisianni; taamakkaluartoq isumaqarnarpoq eqqarsarnarlunilu immaqa illoqarfimmut ataatsimut, ataatsikkut umiarsuit tallimat amerlavallaalaannginnerpat?

Innuttaasut amerlassusaat, sullissisinnaasullu eqqarsaatigalugit, soorluuna umiarsuit, ataatsikkut tallimat illoqarfimmut ataatsimut tikisinneqarsimanerat torrallataanerpaagunanngitsoq?

Tamatsinnut pissarsiassaq annerpaassappat soorluuna tikittussat agguataanerulaarlugit aaqqiisoqar-simasuuppat, ingerlanneqarsimasuuppallu pitsaanerpaassagaluartoq?

Nunatsinnut takornarissat amerliartornerat akornusinngikkaluarlugu, takornarissap nunatsinnut suli annerusumik aningaasatigut iluaqutigineqarsinnaanera anguniassagutsigu, Aqqalu Jeremiassenip siunnersuutaata saniatigut, umiarsuarnut takornariartaatinut akitsuusersueriaatsitta nalilersuiffiqeq-qinneqarnissaa kissaatiginarpoq, taassumalu saniatigut nammattagaliinnarlutik nunatsinnut takornariartartut akitsuuserneqarsinnaanerat aamma misissuinnermut ilannginneqarsinnaanerat Inuit Ataqtigiit siunnersuutigerusupparput.

Naluneqangitsutut ukiuni kingullerni nammattagaannalerlutik nunatsinnut takornariaqartartut amer-liartorusaarput. Assersuutissaqqissuupput Kangerlussuarmiit Sisimiunut pisorrattartut, taamaaliarlutik Ilulissanut, Qeqertarsuarmullu umiarsuarmik ingerlateqqittartut, ukiunilu kingulerni tusarsaagaluttuinnartut.

Illoqarfitsinnut tikikkunik, unnia taamaallaalliuna illoqarfiup avataanut tupertik napparunikku, taqussaminnullu taamaallaat inuussuteqariarlutik angerlamut aallaqqittarlutik; unnuisarfimmut, neriniartarfimmut, allanulluunniit aningaasartuuteqangilluinnariarlutik angerlamut aallaqqittartunik.

Aamma tamakku qanoq aaqqiivigineqarsinnaanerat, qanoq iluaqutigineqarsinnaanerat aamma misissorneqarsinnaasariaqarpoq.

Taamatut naatsumik oqaaseqarluta, Aqqalu Jeremiassenip siunnersuutaa ataatsimiititaliamut susasaqartumut ingerlateqqipparput, apeqquutit qulaani pineqartut ilanngullugit nalilersuiffiqineqarsinnaaqqullugit.

Qujanaq

In. In. Peter Olsen